

W. Rosch



Band I

Säk'sche Balladen

von Lene Voigt

's Lied vom braven Manne

Es war ämal im Februar.
Dr Himmel sahk so sonderbar,
Un alle Männer, alle Fraun,
Die meenten: „Heite wärds noch daun!“

Un wärklich: nachmittags nach drein,
Da sähte där Schlamassel ein.
Äs Wasser dreesächte vom Gebärche,
's war ä gewaltches Matschgewärche.

Dr Fluß schtiech heher in Minuten.
Äs Zellnerheischen iwern Fluten
Schtand in dr Mitte von dr Brücke,
Un die gink ähmd vergniecht in Schtücke.

Dr Zellner sauste uffn Boden.
Dort guggtr raus un rang de Foden.
Vor Schräcken wordr immer blasser
Un bläkte: „Sibo!“ iwersch Wasser.

Wie ooch där arme Gärl dad schbähñ,
Ä Schußmann, där war nich zu sähn.
Wohl awer heerte driem am Ufer
Ä Graf zu Färd dän Hilferuser.

Dr Edelmann schrie in de Meite:
„Horcht druff, was ich eich sage, Zeite:
Wärn Zellner rätet, gricht von mir
Ä großes Faß voll Lagerbier!“

Se daden alle gärn een schmättern,
Doch geener wollt' bein Zellner glättern.
Dr Graf, wännschon sei Anjinn' scheen:
Berseentlich mocht ooch nich gehñ.

Da gam ä Bauer, sahk die Not
Un hubbte in ä gleenes Boot.
Drohdäm gans gräßlich ging de Wogen,
Dr Zellner ward ans Land gezogen.

Un ooch sei Weib un suffzn Ginder
Dad rätten unser Mann nich minder.
Zuläht ä ibriches noch duddr
Un holt de dicke Schwiechermudder.

Wie brillten da ä „Hoch!“ de Leide
Am Ufer alle voller Freide!
Schon winkt dr Graf ä Diener ran,
Där rollt ä mächtches Bierfaß an.

„Gomm här bei mich, mei wackrer Sohn
Un sauf das Fäßchen aus zum Lohn!“
Doch unser Bauer meent: „Lüb wohl,
Ich mach mr nisch aus Alkohol!“

Gans deitlich sieht mrsch wieder hier:
Dr Häldenmud gommt nich vom Bier.